

Tong yulduzi

Vatan yagonadir,
Vatan bittadir!

N: 20 (67237)
2019-yil 20-may

www.tongyulduzi.uz

Gazeta 1929-yil 1-avgustdan chiqqan boshlagan O'zbekiston Respublikasi bolalar va o'smirlar gazetasi ISSN-2010-6092

YURTBOSHIMGA MAQTANISHGA ARZIGULIK QANDAY ISHLAR QILYAPMIZ?

2-bet

– deydi Prezident tashrif
buyurgan maktab
o'quvchilari



Andijon viloyati, Bo'z tumanidagi 6-umumta'lim maktabida 2000-yilgi Olimpiya o'yinlari chempioni, jahon chempioni, ikki karra Osiyo chempioni Muhammadqodir Abdullayev boks maktabi tashkil etildi. Mazkur maktab yoshlarning boks bilan shug'ullanishlari uchun barcha zarur jihozlar bilan ta'minlandi.



BAYRAMGA AYLANGAN KUN

4-bet



YURTBOSHIMGA MAQTANISHGA ARZIGULIK QANDAY ISHLAR QILYAPMIZ?

– deydi Prezident tashrif buyurgan maktab o'quvchilari

Tasavvur qiling-a, Siz tahsil olayotgan maktabga Yurtboshimiz tashrif buyursalar, bu kutilmagan voqea, ajoyib uchrashuvdan qanchalik hayajon va quvonchga to'lardingiz?! Poytaxtimizning Uchtepa tumanidagi 238-umumta'lim maktabi o'quvchilari o'zlarining ta'rif-u taassurotlari bilan aytganda, ana shunday baxtga sazovor bo'lganidan xabaringiz bor. Ushbu tengdoshlaringiz bilan yaqindan tanishish istagida biz ham mazkur ta'lim dargohiga kirib borar ekanmiz, Prezidentimiz tashrif davomida belgilab bergan reja-yu ishlarni amalga oshirishga kirishilib ketilganiga guvoh bo'ldik. Xuddi shu kuni maktabda Yurtboshimiz tomonidan ishlab chiqilgan besh tashabbusga

oid tadbir ham o'tkazilayotgani ayni muddao bo'ldi. Biz har bir yo'nalish

bo'yicha ustoz-u o'quvchilar tayyorlashgan chiqish-u ko'rgazmalar va turli tanlovlarni kuzatib bir yo'la maktab hayoti va iqtidor egalari bilan tanishdik. Bilim maskanining 6-«A» sinf o'quvchisi Mubina Abdualimova musiqaga qiziqqani bois, ustoz

hayajonlarini ham yashira olmadi:

– Bir kun kelib, men o'qiyotgan maktabga Prezidentimiz keladilar, deb hech o'ylamagan edim. Ustozimdan bu xush-



xabami eshitganimda, rosa quvonib ketdim. Ammo, shu payt o'zimga savol berdim. Men Yurtboshimga aytishga, maqtanishga arzigulik qanday ishlar qilyapman? Ular bizning yanada sifatli ta'lim olishimiz uchun yelib-yugurar ekanlar, biz ham munosib javob qaytarishimiz shart.

Maktab rahbari Saodat opa Malikova esa bugun ustozlarning ham boshi ko'kka yetganini aytdi:

– Uchrashuv davomida Yurtboshimiz Shavkat Mirziyoyevning ta'lim dargohimizni ta'mirlashdan tortib, o'quvchilar uchun yangidan-yangi sharoitlar yaratishga doir bergan ko'rsatmalaridan mamnunmiz. Ularning bu ishlar shaxsan nazoratimda bo'ladi, degan gaplari meni juda ta'sirlantirdi.

Biz esa ma'naviy-ma'rifiy ishlar bo'yicha direktor o'rinbosarlari Hilola Isroilova va Gulandom Ergasheva hamrohligida yana bolalar davrasiga oshiqdik. O'quvchilardan biri faxr va hayajon bilan «Bilasizmi, bizni maktabni-chi, endi Prezident kelgan maktab, deb gapirishyapti», desa, yana bir o'quvchi, «Kecha sevimli san'atkorimiz Ozodbek Nazarbekov keldilar, bugun siz... Endi bizni maktab mashhur,

unga munosib bo'lishimiz kerak», deydi g'urur bilan.

Yakuniga yetayotgan o'quv yilini ana shunday quvonch bilan tamomlayotgan bu o'quvchilarni ta'tildan so'ng bundan-dam hayajonli damlar kutmoqda. Zero, ular kelgusi o'quv yilini to'la ta'mirlanغان zamonaviy ta'lim dargohida boshlashadi.

Sayyora QODIROVA

«ONAJONIM TABIAT» tanloviga



Hech o'ylab ko'rganmisiz, ona tabiatning ne'matlarini qachon taniy boshlaganmiz?

To esinizingni tanigunga qadar, sevimli yozuvchimiz Oybek ta'riflaganidek, tuprog'ida oltin gullaguvchi ona yerimizda yetishtiriladigan mevalarni yegamiz, sharbatlarini ichganmiz, poliz ekinlari-yu sabzavotlarni sevib iste'mol qilganmiz. Ba'zan xorijiy mevalarni maqtab yeyishlarining guvohi bo'laman. Ammo men Ona yurtimiz mevalarini hech qaysi davlat mevalariga alishmayman.

BOG'LARIMIZ SAXOVATI

Esimizni taniy-tanimay atrofimizdagi ochilib turgan binafsha-yu chuchmoma, lolaqizg'aldog'-u lolalarning go'zalligidan zavqlanamiz. Kattalar, uzma, deyishsa-da, quloq solmaganmiz. Ammo men daraxtlar-u gullarga, umuman, tabiatga ozor bermaslikni otanamdan o'rganganman.

Hovlimizdagi mo'jazzina bog'imizga qarashni yaxshi ko'ramiz. Unda anor, gilos, olma, nok, tut kabi mevali daraxtlar bor. Bahor kelishi bilan ularni oqlaymiz, gullar ekamiz. Shuningdek, tuvalarda ham gullarni parvarishlaymiz. Onam daraxtlarni parvarishlash, gullar landshaftini yaratishga juda qiziqadilar, ular atrof-muhitni ozoda saqlashimizga doimo e'tibor beradilar.

O'z bog'imizdan mevalarni uzib yeyishning gashti bo'lakcha. Bobolarimiz «Mehnat qilib topganing qand-u asal totganing», deb bejizga aytishmaganiga guvoh bo'lamiz. Uyimizga kelgan mehmonlar ham hosilga kirgan mevalarimizni ko'rib, havas qilishadi. Dadam va oyimni qo'ligul insonlar, deb maqtashadi. Biz ham ular bilan faxrlanamiz.

Tabiatga qancha ko'p mehr bersak, bu mehr yuz chandon bo'lib qaytishiga o'z bog'imiz misolida amin bo'lganimni tengdoshlarimga ham so'zlagim keldi.

Kamola KARIMJONOVA,
Toshkent viloyati, Qibray tumanidagi
14-umumta'lim maktabining 7-«B» sinf o'quvchisi



Dilorom Xudoyqulova tashkil etgan «Xor» to'garagiga qatnashar ekan. Qizaloq orzu-istaklari haqida so'zlay turib, Yurtboshimizning tashrifidan olgan

«Yaylovda»



Kumush ABDULQAYUMOVA,
poytaxtimizning Yashnobod tumanidagi 206-umumta'lim
maktabining 3-«A» sinf o'quvchisi

**Mana, bugun zo'r bayram,
Har yurakda havas bor.
Salom, aziz maktabim,
Xayr bog'cham, yaxshi qol!**

BIZ MAKTABGA BORAMIZ

Jajji bolajonlar ijrosida ushbu she'rni eshitgan har bir inson o'z bolaligini, bog'chaga borgan paytlarini xotirlasa, ajabmas.

Kuni kecha poytaxtimizning Olmazor tumanidagi «Uchar kema» nomli 464-maktabgacha ta'lim muassasasida tayyorlov guruhi tarbiyalanuvchilari ishtirokida bog'cha bilan xayrlashuv tadbiri bo'lib o'tdi.

Bayramda bolajonlar tarbiyachi opalari Dildora Kuliyeva yordamida tayyorlagan qiziqarli she'r, qo'shiq, sahna ko'rinishlarini ijro etdilar. Kechani ertak qahramonlari – Buratino va Malvina musiqa sadolari ostida ochib berdi:



– Maktab degani bu nima o'zi, menga tushuntirib beringlar? – so'radi Buratino.

– Hozir bu yerda o'tirgan bolajonlar bizga maktab nimeligini tushuntirib berishadi,

– deya bolajonlarga yuzlandi Malvina.

So'ng, kichkintoylar Xayrullo Abdullayev, Muslima Abduqodirova, Sevinch Qah-

ramonova, Mubina Sobirjonovalar go'yo Buratino va Malvinaga dars jarayonini ko'rsatish orqali maktabga tayyor ekanliklarini namoyish

etishdi.

Tadbir davomida bolalar ingliz tili o'qituvchisi Feruza opa Muhiddinova bilan birgalikda savol-javoblar o'yinini o'ynashdi.

O'g'il-qizlarning quvnoq raqslari bayramga yanada ko'tarinki ruh bag'ishladi.

Xayrlashuv oqshomi o'z nihoyasiga yetar ekan, muassasa mudirasi Zilola opa Malikova jajji qaldirg'ochlarga a'lo baholarga o'qib, bilimli, zukko, fidoyi o'g'il-qizlar bo'lib ulg'aydinglar, deya niyat bildirdi. Ularga oq yo'l tilab, esdalik sovg'alari ulashdi.

Nigora ABDUNAZAROVA

MADANIYATMI YO MAYDA ILLAT?!

Navbatdagi ma'naviyat darsida ustozimiz «Millat o'zi nima?», «Millatni millat qiladigan omillar qanday?» deya savolni o'rtaga tashladilar. Sinf-doshlarimiz birin-ketin qo'l ko'tarib, millat bu bir urug'ga mansub tub aholi, bir hududda yashovchi xalq millatdir kabi javoblarni aytishdi. Ustozimiz javoblarni tinglab, bir muddat mulohaza qildilar-da, so'ng javoblarga aniqlik kiritdilar:

– Bir to'da odamlar bo'lib qolmaydi. Millatni millat qiladigan bu bir xalqning asrlar osha o'zgarib, avlodlardan avlodlarga o'tib kelayotgan tarixi, dini, tili va mentalitetidan kelib chiqadigan dunyoqarashi, ma'naviyati, milliy qadriyatlarini, an'ana va urf-odatlaridir, – dedilar.

Ustozning bunday fikr yuritishlari eng to'g'ri javob edi, nazarimda. Chunki sevimli adiblarimiz Abdulla Qodiriy, Abdulla Qahhor, Said Ahmad, Tog'ay Murod, Pirimqul Qodirov, Tohir Malik singari ijodkorlarning asarlarini o'qir ekanmiz, o'zbek xalqining madaniyati qadimdan qanchalar yuksak bo'lganini ko'rishimiz mumkin. Lekin bugungi internet zamonida ommaviy madaniyatning turli ko'rinishlari, ko'z o'ngimizda sodir bo'layotgan voqealar yoshlarimiz tarbiyasiga tahdid solmoqda. Ayrim tengdoshlarimiz sharqona odob-axloq tamoyillariga, madaniyatiga zid bo'lgan odatlarni o'zlashtirishmoqda. Fikrimning isboti tariqasida o'zim guvoh bo'lgan ayrim voqealar xususida to'xtalsam.

QORA NIQOBLI O'QUVCHI

Bir kuni maktab shifokori qora niqob taqib olgan o'quvchini to'xtatib: «Bahorgi gripp yuqdimi, o'g'lim, yur xonamga, ko'rib qo'yay», dedi. Bola maktab shifokoridan o'zini olib qochib: «Yo'g'ey, opa, hozir qora niqob taqish urf bo'lgan», dedi. Shifokor bu javobdan hayron bo'lib, o'quvchining ortidan qarab qoldi...



YUZIGA TORT CHAPLANGAN BOLA

Yaqinda bir maktabda g'alati voqeaga guvoh bo'ldik. Maktab hovlisida qochib borayotgan bir o'quvchini bolalar quvib, tutib olishdi. Ikki bola uni qo'lidan ushlab turdi, yana biri kattagina tort bo'lagini uning yuziga chaplab chiqdi. Qolgan bir gala bolalar tort chaplangan bolaga tuxum otishdi. Ketchup sepib, ustidan un sochib yuborishdi. Ikki o'quvchi bu voqeani qo'l telefoniga tasvirga tushirib oldi. Qorovul amaki o'quvchilarga qarab: «Nima qilyapsizlar? Un, tort degani – non-ku, uvul emasmi?!» degandi, o'quvchilar: «E, amaki, sinfdoshimizning tug'ilgan kuni bilan tabriklayapmiz. Chet elda hamma shunday qiladi», deyishdi. Yana bir o'quvchi qo'shimcha qilib: «Boshqa sinflar ham shunday qilishyapti. Nima, biz qilolmaymizmi?» deya javob berdi.



TAQLID QILMA, TAHLIL QIL!



Sinfda o'tirsam, bir do'stim qo'lga qora ruchkada cheksizlik belgisini chizayotgandi. «Bu qanday belgi?» deb so'rasam: «Seriallardagi sevishtanlarning abadiy muhabbati ramzi – cheksizlik», deya javob qildi. «Buni senga nima daxli bor?» desam: «Shunchaki ularga o'xshamoqchiman», deya javob berdi. Bir tarafdan sinfdagi qizlarimiz serial tomosha qilganligi tufayli uy vazifalarini bajara olmagani uchun ko'chirib olishni so'rab, xayolimni bo'ldi. Afsuski, bunga o'xshash voqealar tez-tez takrorlanib turibdi. Ayrim tengdoshlarimiz buyuk bobokalonlarimizga, o'z ota-onalariga emas, kimlarga havas, taqlid qilishyapti? Aziz gazetxon do'stim, ayrim tengdoshlarimizning bunday nojo'ya xatti-harakatlariga faqat ommaviy madaniyatni sababchi qilib ko'rsatishimiz to'g'rimi? Dono bobolarimizning «Aybni avval o'zingdan qidir», degan gapini bor. Mana shu ibora ushbu savolimizga javob bo'la oladi, menimcha. Tarixga nazar tashlaydigan bo'lsak, bizning yurtimiz sharq mamlakatlari madaniyat markazi, gavhari bo'lib kelgan. Shunga munosib bo'laylik. Ommaviy madaniyat o'z madaniyatimizga aylanmasin. Ota-bobolarimizdek hurmat topib yashaylik.

Otabek ORTIQOV,
poytaxtimizning Shayxontohur tumanidagi 169-umumta'lim maktabining 9-sinf o'quvchisi

«MUSTAQILLIK – MENING TASAVVURIMDA» tanlovining maktab bosqichlari davom etmoqda

Ma'lumki, yosh avlodning har jihatdan yetuk bo'lib kamol topishida ilm-u ma'rifat nechog'li ahamiyat kasb etsa, musiqa va san'atning o'rni ham shu qadar muhim. O'quvchilarning adabiyotga, tasviriy san'atga bo'lgan mehrini oshirish orqali ularni komil inson bo'lib ulg'ayishlariga hissa qo'shish maqsadida O'zbekiston «Milliy tiklanish» demokratik partiyasi Toshkent shahar Kengashi tashabbusi bilan «Mustaqillik mening tasavvurimda» nomli ko'rik-tanlov e'lon qilingan edi.



Ayni kunlarda Toshkent shahar Xalq ta'limi bosh boshqarmasi, O'zbekiston Yozuvchilar uyushmasi, «Yoshlar ovozi», «Tong yulduzi» gazetalar va yana bir qator tashkilotlar bilan hamkorlikda poytaxtimizdagi barcha umumta'lim maktablari o'quvchilari o'rtasida o'tkazilishi ko'zda tutilgan mazkur tanlovning maktab bosqichlari o'tkazilmoqda. Poytaxtdagi umumta'lim maskanlarida yoshlarning adabiyot va san'atga bo'lgan qiziqishlarini oshirish, iste'dodini yuzaga chiqarish, shuning barobarida, bebaho ne'matimiz – yurtimiz mustaqilligi qadriini yanada yuksaltirish maqsadida e'lon qilingan mazkur tanlovning maktab bosqichlari bo'lib o'tmoqda.

Jumladan, Mirzo Ulug'bek tumanidagi 256-umumta'lim maktabining tasviriy san'atga mehr qo'ygan iqtidorli o'quvchilari «Mustaqillik mening tasavvurimda» nomli ko'rik-tanlovning maktab bosqichi yakunlandi. Ushbu ko'rik-tanlovda maktab o'quvchilari faol qatnashib, diplom va esdalik sovg'alari bilan taqdirlandi.

Shuningdek, Yashnobod tumanidagi 206-umumta'lim maktabida ham «Mustaqillik – mening tasavvurimda» nomli ko'rik-tanlovning maktab bosqichi yakunlandi. Ushbu ko'rik-tanlovda maktab o'quvchilari faol qatnashib, diplom va esdalik sovg'alari bilan taqdirlandi.


O'zMTDP Mirzo Ulug'bek tuman Kengashi raisi Sh.Nosirov, tuman xalq ta'limi mudiri Ya.Shodiyeva va maktab o'qituvchilaridan iborat hakamlar hay'ati ishtirokchilarning mavzu bo'yicha tayyorlagan ijod namunalari baholab, g'oliblarni aniqladi. Shu kuni mazkur ko'rik-tanlovning tuman bosqichini o'tkazishga tayyorgarlik ko'rish masalasi ham muhokama qilindi.

Yosh musavvirlarga tanlovning tuman, shahar bosqichlarida ham omad yor bo'lishiga biz ham tilakdoshmiz.

O'z muxbirimiz



VATAN QIYOSI



sak. Geosiyosat deganda muayyan bir mamlakatning o'rni, tabiiy boyliklari, iqlimi va boshqa geografik omillarining davlat tashqi siyosatiga ta'sirini ifodalash tushuniladi, – deya geografiya fani o'qituvchisi Odina Berdiqulova 10-sinf o'quvchilariga darsni tushuntirar ekan, ularni ham munozaraga, bahsga chorladi. O'quvchilar mamlakatimizning tabiiy boyliklarini tejab ishlatish, tabiatga ozor bermaslik lozimligi zaharli chiqindilarni qanday yo'q qilish haqida so'zladilar.

Odina opa darsni so'nggi ped-texnologiyalar asosida, ko'rgazmali qurollar va slaydlar yordamida o'tdi. Har bir yangi mavzuga o'z gacha yondashadigan, izlanuvchan ustozning darslariga o'quvchilar sidqidildan tayyorlanishadi. Bu esa o'quvchilarning geografiya fanini puxta o'zlashtirishlariga zamin yaratishi, shubhasiz.

Shahlo MIRZAYEVA,
Samarqand viloyati, Tayloq tumanidagi 51-umumta'lim maktabi
Yoshlar ittifoqi yetakchisi

– Qani, ayting-chi, bolajonlar, yurtimizda qanday tabiiy boyliklar mavjud?

Javob berishga shay turgan o'quvchilar darhol qo'l ko'tarishdi.

Bolalarning javobidan qoniqqan o'qituvchi o'tgan darsdagi mavzuni mustahkamlab olgach, yangi mavzuni boshladi.

– Boya bejizga tabiiy boyliklar haqida to'xtalmadim. Bugungi ochiq darsimiz «O'zbekistonning geosiyosiy o'rni va xalqaro munosabatlari» mavzusida bo'ladi. Avvalo, geosiyosat so'zining ma'nosi haqida to'xtal-



BAYRAMGA AYLANGAN KUN

Maktabimizda deyarli har kuni biror tadbir o'tkaziladi, desam, ishonaverim! Yurtboshimiz tomonidan beshta muhim tashabbus ilgari surilgach, to'garaklarga jalb qilinmagan, sport-u kitob bilan do'stlashmagan o'quvchi qolmadi, hisobi. Hattoki ota-onalarni ham «5 ta muhim tashabbus» dasturi doirasida tashkil qilingan «Ochiq eshiklar» kuniga taklif etdik.

Shu kuni ta'lim dargohimizda katta bayram bo'layotganday edi, go'yo. Maktabimiz hovlisida raqqosa qizlar, bo'lajak rassomlar o'z iste'dodlarini namoyish etishgan bo'lsa, faollar zalida «Drama» to'garagi a'zolari tomonidan sahna ko'rinishlari ko'rsatildi. Shaxmat-shashka, taekvando, stol tennisi kabi to'garaklar a'zolarining chiqishlari esa barchani hayratlantirdi. Maktabimiz direktori Nabi Niyozov, ma'naviy-ma'rifiy ishlar bo'yicha direktor o'rinbosari Dilnoza Mamatovaning jonkuyarliklarini ko'rib, biz ustozlar ham chetda turmadik.

Rahbarligimdagi 1-«A» sinf o'quvchilari bilan o'quv yilining so'nggi kunlaridagi darslarimizdan birini kitob do'konida o'tkazishni rejaladik. Poytaxtimizning Darxon ko'chasida joylashgan ko'rkam va muhtasham «Kitob

olami» hamda shahrimiz markazidagi «Sharq ziyokori» do'konlariga kirib borar ekanmiz, bu maskanlardan nur-u ziyo taralib turardi, go'yo. Sayohat darsimizda o'quvchilar o'zlari qiziqqan mavzudagi kitoblar bilan tanishishdi va shaxsiy kutubxonalar uchun kitob xarid qilishdi. Shuningdek, sinfimizdagi mo'jazgina kutubxonamiz uchun talaygina kitoblar xarid qildik. Bolajonlarga, ayniqsa, topishmoq va maqollar, tez aytishlar jamlangan kitobchalar juda manzur bo'ldi. Endi ular yozgi ta'tilda bu kitoblarni miriqib mutolaa qilishadi.

Novvotoy PARDAYEVA,
poytaxtimizning Yashnobod tumanidagi
226-umumta'lim maktabining boshlang'ich
sinf o'qituvchisi

FAN OYLI GI MAZMUNU O'TMOQDA

Bizning o'quv dargohimizda ham «Xorijiy tillar fan oyligi» mazmunli o'tmoqda.

Kuni kecha ta'lim muassasasining 4-«D» sinfida o'tkazilgan ochiq darsda o'quvchilar bir necha shartlar bo'yicha o'zaro bellashdilar. Ayniqsa, o'quvchilar tomonidan «Xo'tikcha va chumchuq», «Kim dono?» singari ertaklarining ingliz tilidagi talqini ko'pchilikka manzur bo'ldi. Darsni kuzatgan Manzura Nabiyeva, Zuhra Safarova va Malikabonu Ahmadaliyeva o'quvchilarning bilimlarini yuqori baholadi.

**Zilola SIROJIDDINOVA,
Toshkent viloyati, Angren shahridagi
41-umumta'lim maktabining ingliz tili fani o'qituvchisi**

Maktabimizda «Ingliz tili fani oyligi»ni yuqori saviyada o'tkazish maqsadida «Fan oyligini o'tkazish chora-tadbirlar rejasini» ishlab chiqildi. Fan oyligining ochilish marosimi barcha ingliz tili o'qituvchilari tomonidan tashkillashtirilgan sahna ko'rinishlari, chiroyli kuy va qo'shiqlar, qiziqarli o'yinlar bilan o'tkazildi.

O'qituvchilar o'rtasida «Eng ijodkor o'qituvchi», «Eng namunali ochiq dars», boshlang'ich sinf o'quvchilari o'rtasida kitobxonlikni keng targ'ib qilish maqsadida o'quvchilarning o'zlari o'qigan ertaklari asosida o'qituvchisi yordamida «Eng yaxshi sahna ko'rinishi», yuqori sinf o'quvchilari o'rtasida «Eng yaxshi insholar», «Yosh gid», «Quvnoqlar va zukkolar», «Eng ijodkor o'qituvchi» nominatsiyalari bo'yicha tanlovlar tashkillashtirildi.



«Eng ijodkor o'qituvchi» nominatsiyasida Feruza Hojiqul qizi, «Eng namunali ochiq dars»da Halima Alimova, «Eng yaxshi sahna ko'rinishi» bo'yicha esa Nilufar Abdullayeva tomonidan 4-«D» sinf o'quvchilari ishtirokida «Zumrad va Qimmat» ertagi asosida sahnalashtirilgan sahna ko'rinishi g'oliblikni qo'lga kiritdi.

Ustozlardan Madina Umarova va Gulchehra Zokirova tomonidan 8-sinf o'quvchilari o'rtasida tashkil etilgan «Quvnoqlar va zukkolar» bellashuvida 8-«G» sinf o'quvchilari g'olib bo'lishdi. 10-«A» sinf o'quvchisi Kamola To'xtamurodova «Eng yaxshi insholar» tanlovida, 9-«G» sinfdan Shahzoda Mamadaliyeva «Eng yaxshi gid», Mashhura Bozorova esa «Eng ijodkor o'qituvchi» nominatsiyalari g'olibi bo'lishdi.

G'oliblar faxriy yorliqlar va yangi nashrdan chiqqan kitoblar bilan taqdirlanishdi.

**Feruza TOHIROVA,
poytaxtimizning Sergeli tumanidagi
104-umumta'lim maktabining ingliz tili fani o'qituvchisi**



Lesson 20

MEMORIAL DAY

Karim studies at 6th form. He went to see his grandparents who live in the next village. Because he knew that that day was the Memory and Appreciation Day.

His grandparents became very happy. Karim helped his grandmother with housework. And in the afternoon he took the sheep out to the valley to feed instead of his grandfather.

Vocabulary list:
Village – qishloq,
Appreciate – qadrlamoq,
Help – yordamlashmoq,
Valley – yaylov.

**Akmal KARSHIBAYEV,
The teacher of school № 6, in Zomin
district Jizzakh region**

APPRECIATE QUOTES

«Make it a habit to tell people thank you. To express your appreciation, sincerely and without the expectation of anything in return. Truly appreciate those around you, and you'll soon find many others around you. Truly appreciate life and you'll find that you have more of it».

Ralph MARSTON

«Appreciation is a wonderful thing. It makes what is excellent in others belong to us as well».

VOLTAIRE

«Change your expectation for appreciation and the world changes instantly».

Tony ROBBINS

THE SLAVE AND THE LION

It happened in ancient times that a slave named Androcles escaped from his master and fled into the forest, and he wandered there for a long time until he was weary.

Just then he heard a lion near him moaning and groaning and at times roaring terribly. And when he tried to get up, there he saw the lion coming towards him.

Instead of attacking him it kept on moaning and groaning and looking at Androcles, who saw that the lion was holding out his right paw, which was covered with blood and very much swollen. Looking more closely at it, Androcles saw a great big thorn pressed into the paw, which was the cause of all the lion's trouble.

Plucking up courage, he seized hold of the thorn and drew it out of the lion's paw, who roared with pain when the thorn came out, but soon after found such relief from it that he rubbed up against Androcles, and showed that he knew, that he was truly thankful for being relieved from such pain.

One day, a number of soldiers came marching through the forest and found Androcles. They took him prisoner and brought him back to the town, and he was condemned to death because he had fled from his master.

Now it used to be the custom to throw murderers and other criminals to the lions, and on the appointed day he was led forth into the arena.

The Emperor of Rome was in the royal box that day and gave the signal for the lion to come out and attack Androcles. But when it came out of its cage and got near Androcles, what do you think it did? Instead of jumping upon him, it rubbed up against him, and stroked him with its paw.

It was of course the lion which Androcles had met in the forest. The Emperor summoned Androcles to him. So Androcles told the Emperor all that had happened to him and how the lion was showing gratitude for his having relieved it of the thorn. Thereupon, the emperor pardoned Androcles and ordered his master to set him free, while the lion was taken back into the forest and let loose to enjoy freedom once more.

AESOP



Atxamjon AKBAROV

GULCHEHRANING ONASI

Dunyoda eng mehribon,
Dilbandiga girgitton.
Tinim bilmas hech qachon,
Gulchehraning onasi.

Mehri tog'dan-da baland,
So'zi shirin-shakar, qand.
Dili dillarga payvand,
Gulchehraning onasi.

O'zi juda ham kamtar,
Har bir so'zi oltin, zar.
Duodadir har mahal,
Gulchehraning onasi.

Omon bo'lsinlar doim,
Shod yursinlar iloyim.
Aslida, mening oyim —
Gulchehraning onasi.



BAXTLI BOLALIK

Musaffo osmon,
Yashaymiz shodon.
Vatan bag'rida,
Kuylaymiz har on.

Borliq zavqidan,
Yuramiz xandon.
Tinchlik qadriga,
Yetamiz har on.

Orzu olamin,
Yugurib shodon.
Neni istasak,
Bor katta imkon.

Yovuz yomondan,
Yursak ko'p yiroq.
Quchog'in ochar,
Dunyomiz har chog'.

Sening mehringda,
O'sib ulg'aydik.
Doim bor bo'lg'in,
Baxtli bolalik.

Dilnura HAMROYEVA,
Qashqadaryo viloyati,
Shahrisabz tumanidagi
29-umumta'lim maktabining
3-«B» sinf o'quvchisi



USTOZNI XOTIRLAB

Ustoz bilan so'nggi bor uylarida betob bo'lib yotgan vaqtlari ko'rishgandik. O'shanda suhbatimiz 3 soatga cho'zilgandi. U kishi «Tong yulduzi» gazetasi haqida iliq fikrlar aytgandi. Mening ijodga qiziqishimga katta turki bo'lgan, shu sabab, «Tong yulduzi» tahririyatida ishlaganimdan faxrlanaman, degandi ustoz. Umid qilamanki, kelajakda bu nashr ustoz aytganlaridek, juda ko'plab yosh qalamkashlar uchun adabiyot tongining Yulduzi bo'lib xizmat qiladi. Ustozning ruhlari shod bo'lsin!

Jamoliddin ABDULLAYEV



Adabiyot bu daraxtlarning kurtak yoyishi, qushlarning ovozi, suvlarning shildirab oqishidir. Tabiatning bor go'zalligini his qila olgan inson haqiqiy ijodkor bo'lib yetishadi. Ilhom manbai bo'lgan borliq sinoatlarini boricha bayon qilishga bo'lgan harakat adabiyot olamiga yetaklaydi...

Yoshligimdan kichik-kichik hikoya, maqola, qatralar yozib, adabiyotning oltin qasriga qadam qo'ydim. Ilk bor «Tong yulduzi» gazetasida chop etilgan «Mening bilim maskanim» nomli maqolamni ko'rganimda, juda quvongan edim. Meni ijod olamiga kirib kelishimda ustozim Hamroxon Mamatqulovanning hissasi beqiyos. Ularning «Adabiyot zulmatdan yorug'likka olib chiquvchi nur», degan o'gitlari menga ilhom bag'ishlagan, desam, adashmayman.

ADABIYOT BILAN HAMNAFAS

Ustozlarim bergan bilimlar tu-fayli juda ko'p tanlovlarda qatnashib, ko'plab muvaffaqiyatlarga erishdim. Masalan, «Kamalak» yulduzlari bolalar ijodiyoti festivalida, «Yuksak ma'naviyatli avlod» tanlovining respublika bosqichida, «Zulfiyaxonim qizlari» ko'rik-tanlovida ishtirok etib, garchand g'olib bo'lolmasam-da, respublika bosqichida qatnashish baxtiga mu-yassar bo'lganman.

Kelajakda andijonlik shoirlar Nodirabegim va Saida Zunnunova singari o'z ijodim bilan adabiyotimiz, yangi g'oyalarim bilan yurtimiz ravnaqiga hissa qo'shishga harakat qilaman.

Sadoqat SOLIJONOVA,
Andijon viloyati, Jalaquduq tumani

Bir bor ekan, bir yo'q ekan, qalin o'rmonda tulki bilan bo'ri yashagan ekan.

Bir kuni tulki bo'riga insonlar haqida gapirib beribdi. «Sen insonlarni bir marta bo'lsa ham ko'rganmisan?», so'rabdi bo'ri tulkidan. Tulki: «Ha, ko'rganman», deb javob qilindi. Shunda qiziquvchan Bo'ri: «Do'stim tulkivoy, sen menga ham insonlarni ko'rsata olasanmi? Men ham ular haqida ko'proq bilishni judayam istayman», debdi. «Albatta, men senga ularni ko'rsataman, men bilan yur», deb javob qilindi tulki. Tulki va bo'ri o'rmonda biroz yurib, bir daraxt tagiga o'tirishibdi. Shunda kekxa bir odam ularning yonidan o'tib qolibdi. Bo'ri tulkidan shoshilganicha: «Bu odammi?» deb so'rabdi. Tulki: «Yo'q, bu eski davrning odami», deb javob beribdi. Undan keyin maktabga ketayotgan bir bolakay o'tibdi. Bo'ri yana tulkidan: «Bu odammi?» deb so'rabdi. Tulki: «Yo'q, bu kelgusi davrning odami bo'ladi», deb javob beribdi. Shu payt ularning yonidan yelkasiga miltiq osgan bir odam o'tibdi. Tulki: «Bu odam, uning yoniga bor va salom berishni unutma. Men uyga borishim kerak, bolalarim kutyapti», debdi-da, chopib ketibdi. Bechora bo'ri esa ovchining o'ljasiga aylanibdi.

Shunday qilib, ayyor tulki laqma bo'rini yana hiyla yo'li bilan aldabdi.

Nemis tilidan Shohsanam QODIROVA tarjimasi,
Farg'ona viloyati, Rish-ton tumanidagi 19-umumta'lim maktabi o'quvchisi

Aka-uka GRIMMlar

BO'RI VA INSON

(Ertak)



KELAJAKKA BO'LGAN ISHONCH

Navoiy viloyati, Zarafshon shahridagi 2-umumta'lim maktabi «Obod mahalla» Davlat dasturi asosida kapital ta'mirdan chiqarildi va foydalanishga topshirildi. «Buyuk kelajakka qat'iy ishonch bilan!» shiori ostida faoliyat yuritayotgan mazkur bilim maskani o'quvchilari 2018-2019-o'quv yilida ko'plab maqtashga arzigulik natijalarga erishdi. Keling, bu haqda batafsilroq to'xtalaylik.

Yaqinda Furqat tumanidagi Bolalar va o'smirlar sport maktabida o'smirlar o'rtasida boks bo'yicha xalqaro musobaqa bo'lib o'tdi. Musobaqada o'zbekistonlik bokschilar bilan bir qatorda, Qozog'iston, Qirg'iziston, Tojikiston davlatlaridan 336 nafar bokschilar kuch sinashdi. Shogirdim Ozodbek Aliyev 2006-2007-yilda tug'ilgan o'smirlar o'rtasida 57 kg vazn toifasida qatnashib, 2-o'rinni qo'lga kiritdi.

OZODBEK G'OLIB BO'LDI



Boks to'garagimiz mashg'ulotlariga bir yildan buyon muntazam qatnashayotgan Ozodbek juda tirishqoq bola. To'garakka 60 nafardan ko'p o'quvchilar qatnaydi. Asrorbek Haydaraliyev, Behruzbek G'ulomjonov, Diyorbek Tursunov, Zirkillo Muhammadaliyev kabi shogirdlarimdan ham umidim

katta. Ozodbek kelajakda Bektemir Meliqo'ziyev, Shaxram G'iyosov, Hasanboy Do'smatovday bokschi bo'lishni orzu qiladi. U, shuningdek, ustozlaridan ingliz va rus tillarini ham puxta o'rganyapti. Chunki u sportchi agar boshqa xalqlarning ham tillarini bilsa, xalqaro musobaqalarda bema'lol tengdoshlari bilan tillashishi, yangi do'stlar orttirishi mumkinligini yaxshi biladi.

Yaqinda boks bo'yicha Furqat tumani birinchiligida ham shogirdim 2-o'rinni egallashga musharraf bo'ldi. Men sportga oshno o'quvchilarim muvaffaqiyatlari yanada yuksak bo'lishini istayman. Shogirdlarimga g'alabaga tinimsiz mashqlar, qat'iyatlilik orqali erishilishini uqtiraman.

Jo'rabek BEGMATOV,
Farg'ona viloyati, Beshariq tumanidagi 44-umumta'lim maktabining jismoniy tarbiya fani o'qituvchisi, boks bo'yicha sport ustasi

BOLAGA KITOB BERING

Hozirgi kunda mamlakatimizda barcha sohalarida bo'lgani kabi madaniyat va ma'rifat sohasida ham tub islohotlar amalga oshirilmoqda. Ayniqsa, kitob mutolaasi, kitobxonlikni targ'ib qilish borasidagi sa'y-harakatlar hozirdanoq o'z ijobiy samarasini bermoqda.

O'zbekiston Respublikasi Prezidenti raisligida 2019-yil 19-mart kuni o'tkazilgan videoselektor yig'ilishida 5 ta muhim tashabbus ilgari surilgan bo'lib, to'rtinchi tashabbus aynan o'quvchi-yoshlar ma'naviyatini yuksaltirish, ular o'rtasida kitobxonlikni keng targ'ib qilishga yo'naltirilgan.



Prezidentimiz tashabbuslari bilan davlat va jamoat arboblari, tashkilot va korxonalar rahbarlari, taniqli shoir va yozuvchilar tomonidan o'zlari tahsil olgan maktablarga kitoblar sovg'a qilina-yotganligi yoshlar kelajagi uchun uzoqni ko'zlab qilingan samarali ishlar debochasidir.

Yaqinda bilim maskanimizning sobiq o'quvchilari tomonidan maktab kutubxonasiga kitob sovg'a qilish tadbiri bo'lib o'tdi. Shu maktabni 1991-yilda tamomlagan bitiruvchilar – Respublika bolalar kutubxonasi direktori D.O'rolov va Respublika bolalar kutubxonasi bo'lim boshlig'i Sh.Normatov tomonidan maktab o'quvchilariga 100 dan ortiq o'zbek va jahon bolalar adabiyotlari taqdim etildi. Yosh avlodning ma'naviy-intellektual salohiyati, ong-u tafakkuri va dunyoqarashini yuksaltirishda, ona Vatani, xalqiga muhabbat hamda sadoqat tuyg'usi bilan yashaydigan barkamol shaxsni tarbiyalashda beqiyos ahamiyatga ega bo'lgan kitobxonlik madaniyatini oshirishga alohida e'tibor qaratilayotganligini ta'kidlashdi.

Uchrashuvda 14-umumta'lim maktabining ona tili va adabiyot fani o'qituvchisi A. O'rolov, maktab kutubxonachisi G. Boymatova so'zga chiqib, kitobxonlikni targ'ib qiluvchi fikrlari bilan o'rtoqlashdilar.

Anvar ILYASOV,
Samarqand viloyati, Bulung'ur tumanidagi 14-umumta'lim maktabi direktori

Maktab direktori Dilbar opa To'xtayeva o'zi ham tinmay, boshqalardan ham shunday ishlashni talab qiladigan rahbarlar sirasiga kiradi. Ustoz tomonidan «Mamlakatimizning mingyillik rivojlanish maqsadlari» g'oyalari asoslanib, ekologik barqarorlikni ta'minlash, bioxilma-xilliklarni asrash maqsadida «Cho'l hududida ekologik muvozanatni saqlashda saksosul butazorlarining o'rmi» loyihasi tatbiq etildi. Mazkur loyihada Dilbar opa «Suv elektroenergiya iqtisodiyoti bo'yicha» videoroliklari bilan ishtirok etdi.

Maktabda kulolchilik va teriga ishlov berish hamda milliy miniatyura asarlarini teri va qovoqlarga chizish bo'yicha Lobar Jabborova boshchiligidagi to'garak faoliyati ham yo'lga qo'yilgan. Ustozning eng iqtidorli shogirdlaridan 11-sinf o'quvchisi Asaxon Quvvatova, 10-sinf o'quvchisi Alisher Aktamovning ijodiy ishlari kishi ko'zini quvnatadi.

Lobar opaning izlanishlari-yu mehnatlari zoye ketmadi. U «Eng yaxshi ustoz» nomli eng yaxshi innovatsion ko'rgazmalar tanlovining shahar bosqichida 1-o'ringa munosib ko'rildi.



Ta'lim-tarbiya jarayoniga birdek e'tibor qaratadigan bu ta'lim maskanida sportga oshno tutinganlar ham ko'p ekan. E'zoza Egamova 2002-2003-yillarda tug'ilgan qizlar o'rtasida O'zbekiston chempionatida



2-o'rinni egallagan bo'lsa, 8-«A» sinf o'quvchisi Umida Asadova O'zbekiston chempionatida sportning yugurish turi bo'yicha 2-o'ringa, Behruz Amonov aql gimnastikasi sanalagan shaxmat bo'yicha O'zbekiston chempionatida 14 yoshlilar o'rtasida 2-o'ringa sazovor bo'lishdi. Bobur Isomov esa joriy yilda Qozog'iston Respublikasida o'tkazilgan Osiyo chempionatida 2-o'rinni egallab, murabbiyi hamda ustozlari ishonchini oqladi.

Bir donishmanddan, «Siz shunchalar dahosizki, hech kimsa aqlli va hunar bobida sizga teng kela olmaydi. Nechun shu ishlarigiz bilan maqtanib, kishilar oldida obro' olmaysiz?» deb so'raganida, «Ustozning bor obro'si uning shogirdlaridir. Agar ular uquvli bo'lishsa, mening ishlarim davomchisi bo'lishsa, bundan ziyod obro'-e'tibor menga darkor emas», deya javob bergan ekan. Mazkur bilim maskanidagi o'qituvchilarining ham shogirdlaridan umidi katta. Shogirdlar esa ustozlari yuzini yorug' qilish maqsadida tinmay izlanishdalar.

Ozoda TURSUNBOYEVA

KATTALAR HAM MULTIFILM KO'RADIMI?

Bu savolinga, yo'g'-ey, deya javob berishga shoshilmang! Menimcha, multfilm tomosha qilish katta-yu kichikka birday zavq bag'ishlaydi. Axir bolaligida kim ham multfilm ko'rishga qiziqmagan, deysiz?!

Ota-onamizning gap-so'zlaridan bilamizki, ular bolaliklarida «Senimi, shoshmay tur!», «Zumrad va Qimmat», «Karlson va bolakay» kabi multfilmlarni sevib tomosha qilishgan ekan. Hozirgi davrdagi ba'zi haddan ziyod rangli va bachkana tomoshalarni esa ular uncha ham xushlashmaydi. E'tibor bergan bo'lsangiz, chindan ham ularning ayrimlari ongimizni keraksiz ma'lumotlar bilan to'ldirib yuboradi. Ba'zi multfilm qahramonlarining tortishuvlari bizga ham ta'sir ko'rsatadi. Shu bois, multfilmlarni ham saralab ko'rishga odatlanishimiz lozim. Televizor qarshisiga o'tirib olib, ularni ketma-ket tomosha qilavermay, orada kitob o'qishni ham unutmaylik!

Shahzoda TO'LQINOVA,
poytaxtimizning Yashnobod tumanidagi 255-umumta'lim maktabining 7-«A» sinf o'quvchisi

Ma'lumki, Andijon viloyatidagi bunyodkorlik ishlari yangi-yangi turarjoy binolari, istirohat bog'lari, obod ko'chalar, ravon yo'llar, xiyobonlar, bolalar va o'smirlar uchun sport inshootlari - hamma-hammasi aholimizning farovon hayoti uchun xizmat qilmoqda.

ANDIJONDA HAYVONOT BOG'I OCHILDI

Viloyatimizning so'lim, bahavo go'shasi sanalgan «Bog'i Boburiy» istirohat bog'i yaqinida ulkan hayvonot bog'i tashkil etildi. Bu xabardan, ayniqsa, bolajonlarning quvonchi cheksiz bo'ldi. Albatta, bizning Andijon shahar 44-umumta'lim maktabi o'qituvchi va o'quvchilari birinchilardan bo'lib hayvonot bog'iga tashrif buyurdik. Bolalarning quvonchini aytishga til ojizlik qiladi. U yerdagi xilma-xil yovvoyi hayvonlar, parrandalar, suv osti olamining ajoyib-u g'aroyib mavjudotlari, bog' ma'muriyati tomonidan tashkil etilgan turli, qiziqarli attrak-sion o'yinlar o'quvchilarimizga olam-olam quvonch baxsh etdi.

Salimaxon KARIMOVA va Kamila MULIKOVA,
Andijon viloyati, Andijon shahar 44-umumta'lim maktabi o'qituvchilari



Andijon viloyati, Xo'jaobod tumanidagi 5-umumta'lim maktabining boshlang'ich sinf o'quvchilari ham ustozlari Qunduzxon Arzikulova va Nozimaxon Najimovalar boshchiligidagi Andijon hayvonot bog'iga sayohat qilishdi.

BO'SH O'TIRMAI, BOSH QOTIR!

«BOLALAR SPORTI» TOPQIRLIK MASHQLARI

Aylanma krossvord: Javoblarni raqam atrofiga soat mili yo'nalishida yozing.

1. «Umid nihollari» musobaqalari o'tkazilgan shaharlardan biri. 2. Aqliy sport o'yini. 3. Tailandda shaxmatning tezkor turi bo'yicha qizlar o'rtasida o'tkazilgan Osiyo chempionatida oltin medalga sazovor bo'lgan vatandoshimiz. 4. Badiiy gimnastika anjomi turi. 5. Boksdagi holat. 6. Terma jamoaga tavsiya etilgan sportchi. 7. O'zbek kurashida sof g'alabaga berilgan baho. 8. Sport o'yini turi. 9. Termiz shahridagi stadion. 10. Musobaqada g'olib aniqlanadigan so'nggi o'yin. 11. Poyga musobaqalarining so'nggi marrasi. 12. Sport musobaqalari o'tkaziladigan inshoot. 13. Yengil atletika musobaqasida olisga uloqtirish anjomi. 14. Sport sovrini. 15. Futbol maydoni qismi. 16. Og'ir atletika sporti. 17. Teng natija bilan tugallangan bahs. 18. Tennis sporti anjomi. 19. Dzyudo kurashi uchun mo'ljallangan elastik gilam. 20. Yutuq, muvaffaqiyat.

Topshiriq: Shaklning ichki qismlaridagi tasvirlarda qaysi sport turlari ifodalanganligini toping.

Tuzuvchi: Foziljon O'RIPOV

